



Aqqalu C. Jerimiassen

UPA 2022/172

Atassut

16. november 2022

Apeqquteqaat aallaavigalugu oqallisissaq, qanoq iliorluni piujuaannartitsineq tunngavigalugu takornariaqarneq ineriartortinneqassava?

(Inatsisartunut gruppiat, Inuit Ataqtigiit)

Oqallisissiaqartumut aallaqqaatitut taaqqaarusunnarpoq, takornariaqarnikkut siuariartortitseqqissagaanni qaammarsaanerullu atorluaanerullu pitsaanerpaamik inissinnissaanut siunertaqassagaanni matuersaat pitsaanerpaaq tassaammat ilinniagaqarneq!

Takornariaqarnikkulli ullutsinni ilinniartitaaneq ilumut naammannersoq eqqarsaatigineqarsinnaavoq. Aap, ajunngikkaluaqaaq maanna CAK ilinniakkanik pingasuusunik ingerlataqarmat takornarialerinikkut kiffartuussinikkulli ilinniarnermut siunertalimmik.

Takornariaqarnerliuna inerisassagaanni, suna tamarmi tunuliaqutaa eqqarsaatigeqqaarluartariaqagaasoq. Takornariaqarnermullu pitsaasumik periusissiaqarnerinnakkut tamanna iluarsineqarsinnaanissaa qularnarsinnaavoq, suna tamarluinnaat toqqaannartumik toqqaannanngitsumillu kalluarneqartussaq periusiornissami pisariaqarpoq. Tassanilu inuussutissarsiornermut, pilersuinermut taamatullu sulisoqarnermut periusissiat piareersimanissaattaq pisariaqarpoq. Ilami assersuutissaqqissut maanna ilagisaat tassaavoq, takornariaqarnikkut periusissiakkut toqqaannartumik uuttortaruminaappoq, takornariammitaavaaku qassit siunissamut ukiuniluunniit qaninnerni takorluugaanersut, tassani sumiiffinni pisiniarfinni, eqqiaanermut suliaqartuni, assartuinermut suliaqartuni, taxani, bussinilumi qanoq atorfissaqartitsinerup qaffariaateqassanerattaq assiliaq ilivitsunngorlugu periusissiakkut inissinneqarsinnaalertariaqarmat.

Mittafissani pingasuusuni, sullinniakkat takornariaalerumaartussallu sorliit sammineruniarnerlugit sulinissaq pingaartuuvoq, inatsisitigullu tamakkua sukatinngikkaluarlugit, namminersortutut ingerlalerusuttunut siunnerfinnik oqinnerusunik pitsaanerusunillu oqilisaassinitsigut isiginnaartuinnaajuartutut annissuiuarnermillu isuma peeriartortilersinnaavarput.

Uagut takornariaqarnerput qanoq ittuussanersoq mittarfittaareerutta ilusilerniartussaavarput, sinerissallu sinneranut siaarnerusinnaanissaanik suliniutini ilinniangaqarneq tassani sakuusariaqartoq pisariaqarpoq. Pisortaniimmi takornariaqarnerup inerisarneqarnissaa orniginartooq tamani kingullerpaammat, inoqarfinnilu maanna takornariarfiuallaanngitsuni inagingaanissaq aarleqqutigingaanni tikkuinnarluni tikkuartuinani nammineq iliuuseqarnissaq pisariaqarpoq.

Nammineq suliaqalernissarput isiginnaartuinnaanissarpulluunnit, tamanna tamarmi nammineq assatsinniippoq.

Sumiiffiit takornariangassaqqissutut isigiuartakkaguttaaq eqqarsaatigissagaanni, pingaartuuvoq takornariangassaqqissoq ussasaarutigissagaannittaaq sumiiffimmi pineqartumi sammisassanik imaluunnit takornariaq ullunit sisamanit sivisunerusumit uninngatissagaanni suut allat neqeroorutigisinnaasat piginissaat, imaanngittoq oqaannarluni; ”qanna kangerluk takornariangassaqqittorjuuvoq”. Takornariareerpagumi allanittaaq takornariaq takusassaqsinnaanissaa sivisunerusumik uninngatissagutsigu, nunaqqatitsinnut annertuumik qaammarsaassutigisariaqarparput. Ajourisassatullu immaqa isiginagu, aningaasatut isigisalertuugutsigu takornariaq, tassuunakkut nammineq pinnataqsinnaanerput annerungaarpoq.

Sumiiffiit takornariaqarnikkut siuarsimalluartut nunatsinni ilinniarfittut atornerqarniarlik, tassaniimmatami nunatta sinneranut annertuumik iluaqutigineqarsinnaasut tunniussassanik ulikkaartut.

Takornariammi assigiinngitsorpasuupput, pisariaqartittagaalluttaaq aamma assigiinngiluinnarsinnaasarlutik. Juutit muslimillu puulukiminertorneq ajortut assersuutitut atoraanni, takornarialerissagaanni nalunnginnissai pisariaqarluinnarpoq. Ulluinnarni nerisartakkatta qallersuutigisartakkattalu iffiartoraangatta, puulukiminertaqartarneri eqqarsaatigingarneq ajorpagut, taakkunungalu misigisaat nuanneruttortoq kukkuninnguup ataatsip, suna tamaat nuannersoq misigisaat aserorsinnaavaa. Sorpassuusinnaangaluit assersutit, qaninnerpaaq atorsinnaasara assersuutingaara.

Uteqqiinnarusullugulu uuma oqallisissiap oqaaseqarfiginerani naaggasiullugu, Atassummiit ilinniartitaanerup suli maannakkornit takornarialerinikkut pitsaanagerusumik inissisimalernissaa matuersaatitut isigaarput. Tassanilu sumiiffiit takornariaqarfiulluartut atorluarneqartariaqarnerat avaqqunneqarsinnaanngitsortaaq Atassummiit isumaqarluta.

Qujanaq oqallisissiaqartumut.